

Sara Sabri

# BOJANKICE ŠLJOKICE za moje djevojčice





## Selamom širimo ljubav

Selamom širimo ljubav  
u sve krajeve svijeta  
da bi nam mirom blistala  
cijela planeta!

Selam je naš pozdrav  
na jeziku lak  
pri susretu sa muslimanom  
izgovara ga svak!

Selam će nas voditi  
putevima sloge  
do Dženneta ispratit će  
muslimane mnoge.

Nazivajmo selam  
jedni drugima  
jer je u njemu ljubav  
a dobrota u ljudima!





## Islamski šarti

Islamskih je šarta pet  
to trebamo znati  
i svaki od njih bez izuzetka  
redovno izvršavati.

Prvi šart je šehadet  
vjerovanje u Jednog Boga  
i Njegovog Poslanika  
Muhammeda, čistog roba.

Drugi šart je namaz klanjat  
to trebamo od malena znat  
Bogu na sedždu redovno padat  
pa se onda dobru nadat.

Treći šart je ramazanski post  
naš lijepi dragi gost  
do Dženneta on je most  
muslimanu sva radost.






Četvrti je zekat dati  
siromaha obradovati  
od imetka udjeljivati  
pa će Allah nafaku uvećati.

Hadž je peta dužnost sveta  
želja odraslog i djeteta  
da ugleda časni harem  
i poljubi vel'ki znamen.

To su, djeco, islamski šarti  
koje dobro moramo znati  
uvijek ih moramo raditi  
i tek tada sretni biti.



## Sretan bajram


Kada dođe Bajram  
ti obiđi svoje  
rodbinu i prijatelje  
i komšije svoje.

Bajram je naš praznik  
veseo razdragan  
ko u Boga vjeruje  
tad je radostan.

Nek se dječiji žagor  
ulicama širi  
neka Bajram muslimane  
sve izmiri.

Neka živi svjetlost  
našega imana  
bajram nam dolazi  
poslije ramazana.





## Na obali rijeke Jošanice

Na obali rijeke Jošanice  
srele se dvije zelene žabice.

Jedna drugoj se u tuzi žalile  
što su se rijeke jako zagadile.

„Davno je bilo, moja žabice  
kad su se s nama kupale i ribice.

Od smjetlišta ovog talog će ostati  
pa uskoro ni nas neće biti!

Šta učiniše nerazumne glave  
uništiše nam jošaničke vale!”

Do akšama su jadikovale žabice  
na obali zagađene rijeke Jošanice.






## Pjesma majci

Moja majka je najljepša ruža  
što u džennetskoj bašči cvjeta  
draže su mi njene ruke  
od cijelog ovog svijeta.

Moja je majka huriya lijepa  
što si je slatke riječi  
sve tajne ovog svijeta  
sakrile su njene oči.

Najljepšu pjesmu svijeta  
darujem ti, majko mila,  
hvala ti što si me rodila  
hvala ti jedina, divna.





## Revda

U mom gradu, Pazaru  
ima jedan mekteb Revda.

U njemu uče djeca  
pametna i vrijedna.

U tom mektebu Revda  
stiču se nova znanja  
a njegovom avlijom odliježe  
vesela dječija graja.

U moj mekteb Revda  
dolaze najbolja djeca  
ako ne vjeruješ meni  
kazat će ti moja učiteljica.

U mektebu Revda  
bivam sve bolja i bolja  
ako ne vjeruješ meni  
potvrdit će ti mati moja!





## Ihlas

Ima jedna sura fina  
na jeziku lagana  
ona nosi ime Ihlas  
i znaju je djeca sva.

Vrijednost njena velika je  
ko trećine Kur'ana  
ako je budeš učio  
Allah će te čuvat belaja.






## Fatiha

Na početku Kur'ana  
ima sura lagahna.  
Odabranoga stiha  
a zove se Fatiha.

Učimo je pred spavanje  
ili poslije jela  
da nam duša bude  
rahat i vesela.







## Dobra djeca

Dobra djeca govore istinu  
i ponašaju se kao veliki ljudi.  
Ne lažu, ne krađu  
tuđe ne diraju  
da se Allah na njih ne rasrdi.

Dobra djeca slušaju roditelje  
poštuju nanu i djeda svoga  
druže se, uče i svijet vole  
pa ih Allah voli zbog toga.

Dobra djeca i kad porastu  
uvijek će biti dobri ljudi  
klanjaju poste idu u džamiju  
zato i ti međ' dobre budi.






## Životinjska harmonija

Kad zapjeva slavuj  
kad zagače patak  
kad zacvrči cvrčak  
kad zasvijetli svitac...

Kad zakuka kukavica  
kad mjauče maca  
kad zariče krava  
kad zazuji muha...

Kad kukuriče pijetao  
kad poleti orao  
ja se divim Dragom Bogu  
što je sve to stvorio!



## Elhanin namaz


Što li trči tako brzo  
naša Elhana draga?  
Što li trči, pitala se  
golubica mlada.

Gledala je i ruža mala  
kako niz sokak juri.  
Pitala se gdje to lijepa  
Elhana sad žuri.

Uletjela u sobicu  
svoje stare nane  
pa preturati počela  
sanduke joj plave.

„Nano, nano  
brže 'vamo, evo ezan uči  
dok ja uzmem abdest, nano  
sedžad u mi nađi!“





## Mektebska

Rasuli se ko biseri  
po dvorištu mektebovu  
s rančićem na leđima  
s radošću u malom srcu.

Mali moji mektebovci  
bujrum, bujrum škola zove  
da beremo cvijeće znanja  
sa livade mirne ove.

De, u saf stanimo brzo  
sa minare ezan zove  
pa ćemo se poslije vratit  
na igrice stare i nove.

Da Allahu zahvalimo  
što nas skupi ovako lijepe  
jer ko cvjetić mirisno je  
mektebsko svako dijete.





## U Tvoje ime

Kad sabah osvane i zora zarudi  
jarko se sunce u Tvoje ime rađa  
i krasi ljepote proljeća ovog  
ko plavo more što krasi lađa.

I pupoljak cvijeća plavičasta  
na livadi kad se zašareni  
u Tvoje ime otvara latice  
a pred akšam ih zatvori u sjeni.

A ptice dok iznad nas lete  
lepršajući krilima svojim  
šapuću samo ime Tvoje  
i cvrkutom se dive djelima Tvojim.

Kiša kada se prospe  
i ophrli zemlju svu  
u svakoj kapi nosi ime Tvoje  
dok joj se biljke raduju.

Sve stvari ovog svijeta  
samo Tebi sedždu čine  
i ja evo sretna sada  
s njima slavim Tvoje ime.

